

近代中國史料叢刊第十八輯
沈雲龍主編

雲南勘界籌邊記

姚文棟著

附：偵探記·集思廣益編

文海出版社印行

雲南勤畝不壽
邊記

周錫先題首

雲貴總督片

再鹽運使銜直隸候補知府姚文棟前充出使俄德等國隨員差滿回華呈請游歷印度緬甸等處道出巴黎徑出使英法大臣薛福成派令查探印緬商情並滇緬界務咨明總理各國事務衙門及臣等有案茲該員已於緬甸新街取道騰越行抵滇省臣等查姚文棟志趣遠大辦事誠懇平日講求洋務研究輿圖先充出使日本隨員繼由侍郎洪鈞調赴俄德等國隨同辦事該員周歷東西兩洋熟諳外部情形此

次游歷印緬地方並流覽滇邊門戶凡有關形勢之處無不博訪周諮繪圖記載滇省近鄰緬越現與英法交涉滇緬分界通商各事宜尙未開辦亟須熟習洋務之員相爲助理合無仰懇

天恩俯念滇省需材孔亟准將鹽運使銜直隸候補知府姚文棟畱於雲南交臣等差遣委用實於邊務不無裨益謹合詞附片陳請伏乞

聖鑒謹奏

雲貴總督片

再二品銜直隸候補道姚文棟出洋差滿因公來滇
經臣等於光緒十七年六月附片奏請留滇差委欽
奉

硃批著照所請吏部知道欽此欽遵在案茲據該員
稟稱自光緒七年隨使出洋先後計逾十年此次留
滇當差復二年有半現接家信祖塋年久失修必須
及時補葺現在並無經手未完事件懇請銷差離滇
給咨回籍修墓等情前來臣查姚文棟經出使英法

大臣薛福成委令查看印緬商情及滇緬界務遠涉
重洋歷經烟瘴考核精細艱苦備嘗留滇以來歷次
差委均無貽誤茲既據該員稟請回籍修墓查無經
手未完事件自應准其銷差離省除咨吏部查照外
理合會同雲南巡撫臣譚鈞培附片陳明伏乞

聖鑒謹

奏奉

硃批吏部知道欽此

原
书
缺
页

原
书
缺
页

雲南勘界籌邊記上卷目錄

邊界圖

西界已刊南界俟補

論大金沙江形勢上

論大金沙江形勢下

大金沙江形勢續論

南甸土司屬地直至大金沙江考

老蠻暮爲中國必爭之地論

野人山說

八關非滇緬之界辨

言應越關隘碉堡

里麻說

樹漿廠考

論木邦孟密

潞江通舟說

潞江下游以東皆中國屬地考

潞江以東土司論

論大金沙江形勢上

大金沙江形勢其下游去滇遠者吾且不論論其上
游本爲滇屬者按永昌騰越諸志南甸傳云屬部直
抵金沙江與孟養地犬牙相錯又云所部戛獨直通
蠻暮江蠻暮傳云地在金沙江內騰越之西蠻哈山
下當緬人水陸之衝爲隴川右臂孟養傳云其地在
金沙江外古名逸西有香柏城與蠻暮同襟金沙江
孟養居其上流南至底馬撒疆連西洋北極吐蕃西
通天竺東南鄰於緬合此三土司觀之而上游之形

勢備矣孟養之上又有孟拱蠻暮之上又有曼鳩志
皆無傳然騰越四履土產諸篇論之曰從前州境盡
大金沙江內外兼曼鳩蠻暮孟拱孟養而有之蓋蠻
暮曼鳩在江內者也孟養孟拱在江外者也夾江內
外以衛騰越天塹何其雄也江以內有蠻哈南牙諸
山爲之重險表裏山河又何壯也此大金沙江當日
之形勢也明張機作南金沙江考以爲卽梁州之黑
水禹蹟所畫確不可移故論者謂西南極邊由瀾滄
而潞以迄於黑水之金沙爲梁州第一大門戶明時

孟養通文書自稱守金沙江奴婢守此門戶者也由是言之滇其可無大金沙江乎大金沙江內外其可無孟養諸土司乎嘗考我

朝定鼎之初平滇之後孟拱孟養等首先內附見於毛奇齡蠻司合誌毛奇齡廼據史館官書非耳食無稽者比其後征緬之役孟拱孟養皆抒誠効力

高宗御製詩文一再及之尤天下臣民所共覩者焉得謂之非

本朝屬地乎今蠻暮孟拱等土司猶有

本朝所頒印信雖向英國索還故地揆之於理無不可也。能如是則大金沙江之形勢完而全滇之門戶鞏矣。

論大金沙江形勢下

騰越境內之水流入大金沙江舉其大者言之一日
檳榔江一日龍川江雲南通志云檳榔江自古勇塞
外流入合騰越廳所出之大盈江西南流出蠻暮境
西入大金沙江凡騰越以西之水皆入馬龍川江自
怒夷界入邊納曲石猛淋芒市南椀諸河西南自天
馬關流出緬甸入大金沙江凡騰越東南及龍陵以
西之水皆入馬騰越志云甸內甸外諸水以大盈江
龍江兩大水括之可約畧而盡蓋檳榔江與大盈江

合流之後或稱檳榔江或稱大盈江其實一也龍江則卽龍川江也今考兩江入金沙之口本皆在滇屬土司境內龍川入江之口爲蠻暮南境流經木邦孟密至此緬人稱曰那莫江滇中諸志或作莫勒江者誤按騰越志蠻暮傳云東有等練山環以那莫江直走金沙當緬人水陸之衝此江是也此龍川江尾舊屬滇境之明徵也檳榔大盈合流入江之口爲蠻暮北境俗亦稱爲蠻暮江流經南甸之南牙山麓至此說者謂其地正當蠻暮南甸之交故騰越志南甸傳

云所部憂獨直通蠻暮江卽指此江也此大盈江尾
現屬滇境之明徵也試以大金沙江形勢言之自緬
京阿瓦而上以瑞姑新街兩處爲瀕江要地瑞姑雲
南通志作尼孤乾隆時經畧大學士傅恒征緬探得
此路由天馬關出五百九十五里至此下船約三百
里卽至阿瓦城較諸路尤爲近捷者是也此處江道
上有大葫蘆口下有小葫蘆口夾江皆高山江面窄
而底極深兩端皆似葫蘆口故名張機南金沙江考
所云大苜蒲山峽小苜蒲山峽也爲上游江道最險

之處論者謂不得瑞姑則新街難守不得新街則騰越難守蓋恃此兩峽以爲險也昔年蠻暮土司都於新街而扼瑞姑以禦緬甸瑞姑新街皆蠻暮屬地大金沙江上游形勝要害之所在也龍川入金沙江在瑞姑之南小葫蘆口之北新街在大葫蘆口之北而大盈江入金沙之口則又在新街之北皆爲水道旁出之地異時與英勘界如能收回瑞姑及兩葫蘆口則龍川江一路可以無虞最爲上策其次亦須至大盈江入金沙江之口而止以保全南甸舊日之分地

南甸係現屬騰越土司尤非若蠻暮土司自道光以
來棄置不問者可比也

大金沙江形勢續論

難者曰子論大金沙江一在江外之孟養一在下江之蠻暮皆爲滇西形勢所繫然則昔人何不籌之而必待子發之於今耶曰嘻是殆以爲一人之私言歟不徵之於昔將不足信歟夫苟有識者固莫不知之矣豈論今昔哉無已試誦言其一二不觀明臣陳用賓請罷採寶井疏乎其辭云夫蠻暮何地也三宣之藩籬也三宣騰永之垣墉騰永全滇之門戶也蠻暮失必無三宣三宣失必無騰永蓋用賓之論如此而

後人作騰越志乃謂其築八關以棄關外之險豈其實哉又不觀蘇鄧請安插思化疏乎其辭云夫滇南大勢譬之一家蒼洱以東則爲堂奧騰永則爲門戶三宜蠻暮則爲藩籬也所貴藩籬者謂其外禦盜寇內固門庭使爲主人者得優游堂奧以生聚子孫保有貨財斯協名實按王鴻緒明史稿言鄧忌李材招思化以破緬甸之功構之陷獄鄧之爲人可知也然能指陳邊庭大勢其言頗中肯綮則亦非今之忌人成功者所能及矣此皆論蠻暮之形勢者也至於江

外則明儒吳宗堯嘗論之其言曰金沙與瀾潞三水皆源吐蕃入南海號南中經流而金沙江之大且十倍瀾潞極邊有此固天所以限夷夏也然昔論江南形勢者必得江北之地而後江可守築三受降城者越河之外而後河可用宗堯此論雖不言孟養而江外之地固孟養也是卽論孟養之形勢者也且吾見明人之談邊事者言蠻暮必兼言允墨更及於茶山蓋大金沙江上流直通至茶山而允墨亦瀕江要地也允墨卽今允肩與曼鳩相連苟蠻暮不亡則允墨

在內地不必論也孟養之上則有孟拱玉石之所產也苟孟養不亡孟拱不必論也由江外而登茶山階梯於孟拱由江內而登茶山階梯於允冒苟允冒孟拱不亡則茶山亦不必論也此吾所以專論蠻蕃與孟養也騰越志稱茶山之北與麗江野人接境是故茶山有失則麗江危不惟騰越之患也又言孟養北接吐蕃爲今前後兩藏地是故孟養有失則兩藏皆危又不惟滇之患也此其大畧也書不云乎申畫郊圻慎固封守內地且然而况邊徼乎易不云乎王公

設險以守其國險之未足猶且設之而況於自然之
險乎聞者其勿以予言爲河漢也

南甸土司屬地直至大金沙江考

滇與緬有老界新界老界乾隆以前之界新界今日之界也以滇西一面言之乾隆以前大金沙江內外有蠻暮孟密孟養孟拱諸土司屬於騰越夾江兩岸雄跨上游形勢甚壯蠻暮所屬之瑞姑爲江道喉隘有上下兩口可扼之以爲守此老界也新界則以現屬南甸等土司之地爲界瀕大金沙江而止何以明之請一徵之永昌府志再徵之騰越廳志按永昌府志云南甸轄部有羅布司莊小隴川皆百夫長分地

知事謝氏居曩宋閩氏居蓋西屬部直抵大金沙江
與孟養地犬牙相錯又云南牙山甚高延袤百餘里
官道經之上有石梯夷人据此爲險此一証也騰越
廳志云南甸所屬羅卜思莊與小隴川皆百夫長之
分地其世襲知事者二曰謝氏曰閩氏謝氏居曩宋
閩氏居蓋西所部蔓獨直通蠻暮江又云司南百里
爲南牙山險峻延袤百餘里爲入緬之大路上有石
梯緣梯而上有木柵周一里昔王驥破麓川取道於
此前通銅壁關關外布嶺垂哈舊爲百夫長地又云

踰蓋達外有岡德戶岡近孟養故南甸所部直抵大
金沙江此又一証也南牙山卽俗所稱野人山石梯
之險今猶在焉山中有三道一出蓋西一出蓋達一
經石梯之險皆以山外之大金沙江爲界此南甸形
勢之大概也按南甸本名南宋自明初分地受職終
明之世未嘗改更故明史成於

本朝亦稱其屬部直抵大金沙江地最廣未嘗言其
失地於緬也議者乃謂陳用賓築八關而關外之地
棄之域外斯亦謬矣

國初以來南甸早隸版圖至今提封無恙官書如

大清會典

大清一統志

皇朝三通私家著述如顧祖禹方輿紀要毛奇齡蠻
司合誌師範滇繫諸書皆有南甸屬地直至大金沙
江之明文豈非厯厯可信之確証乎夫騰越以西大
金沙江爲第一重門戶昔人固已言之野人山爲第
二重門戶則卽滇中志乘所載之南牙諸山也古稱
勇夫重閉可以爲國者是之謂矣獨是蠻暮孟密孟

養孟拱諸土司乾隆以前內屬日守守在江外有金湯之固其後折入於緬而漫無覺知外戶撤矣是昔日疆吏之過也然南甸屬地猶自畫江爲守野人山在其內則猶守在山外也今若舉野人山而棄之內戶亦撤矣重險皆失將何以保是所望於今日封疆大吏及勘界之使有以維持之也

聖南書界籌遠訂

卷上

二

老蠻暮爲中國必爭之地論

老蠻暮者在大金沙江之東大盈江之北又兩江交會之處也南甸土司分地至此而盡隔大金沙江爲孟養土司騰越志南甸傳云屬部直抵金沙江與孟養地犬牙相錯是也隔大盈江爲蠻暮土司卽今新街南甸傳又云所部曼獨直通蠻暮江是也大盈江上流與檳榔江相合在干崖土司境溯流而上卽至騰越自來談騰越形勢者必曰大金沙江之兩葫蘆口其外戶也而瑞姑爲之鎖鑰蠻暮土司之地盡於